

Tok Pisin - Buk Bilong God - Comfort Scriptures

2 Korin 1:2-4 God Papa bilong yumi, wantaim Bikpela Jisas Krais, i ken marimari long yupela na mekim bel bilong yupela i stap isi. 3 Yumi litimapim nem bilong God, em i God na Papa bilong Bikpela bilong yumi Jisas Krais. Em i Papa bilong yumi, na em i as bilong olgeta pasin marimari na pasin sori. Em i God bilong mekim isi bel bilong olgeta man i gat hevi. 4 Long olgeta hevi i kamap long mipela, em i save mekim isi bel bilong mipela. Olsem na mipela inap long mekim isi bel bilong ol man i gat kain kain hevi, olsem God i save mekim isi bel bilong mipela.

Gutpela Sindaun 15:13 Sapos bel bilong man i amamas, bai pes bilong en i gutpela. Tasol sapos bel bilong man i hevi, bai tingting bilong en i bagarap.

1 King 8:66 Ol dispela bikpela de i pinis, na long de bihain Solomon i salim ol manmeri i go bek long ples bilong ol. Na ol manmeri i tok tenkyu long king long olgeta samting em i bin mekim, na ol i askim Bikpela long mekim gut long em. Na taim ol i go ol i amamas tru, long wanem, ol i tingting long olgeta gutpela samting Bikpela i bin mekim long ol Israel, ol manmeri bilong en, bilong inapim dispela promis em i bin mekim long wokman bilong en, Devit.

1 Stori 16:10 Yumi amamas na givim biknem long em. Ol man i save go klostu long Bikpela, ol i ken amamas tru.

Gutpela Sindaun 12:25 Sapos man i save wari oltaim, em bai i bel hevi tru na tingting bilong en bai i bagarap. Tasol sapos man i mekim gutpela tok long wantok bilong en, orait wantok bai i belgut tru.

Gutpela Sindaun 13:12 Sapos man i ting long kisim wanpela samting na i wet nating longpela taim, bai em i bel hevi moa yet. Tasol sapos em i kisim dispela samting, orait em bai i ting laip bilong en i gutpela tru na em i amamas moa yet.

Aisaia 30:26 Long dispela taim mun bai i lait strong olsem san. Na san bai i lait strong moa yet na lait bilong en bai i kamap bikpela tru i winim lait oltaim em i save givim. I olsem yu bungim lait bilong san bilong 7-pela de wantaim na mekim em i lait long wanpela de tasol. Dispela ol samting bai i kamap long taim Bikpela i mekim gut gen long ol manmeri bilong en na pinisim ol hevi na pen em i bin givim ol.

Hosea 13:8 Bai mi kalap na brukim bros bilong yupela olsem wanpela mama bea i kros long pikinini bilong en i lus. Na bai mi brukim yupela nabaut na daunim yupela wantu olsem laion na ol arapela wel abus i save mekim.

1 Samuel 1:8,10 Na Elkana i save askim em olsem, “Hana, bilong wanem yu

krai? Bilong wanem yu no laik kaikai? Na bilong wanem yu bel hevi oltaim? Tru, yu no bin karim pikinini. Tasol mi ting yu laikim mi tumas, na maski sapos yu bin karim 10-pela pikinini man, ating long tingting bilong yu bai mi stap namba wan.” 10 Hana i pilim nogut tru na i krai moa yet na i prea long Bikpela.

Buk Song o Sam 25:16,17 God, kam long mi gen na marimari long mi, long wanem, mi stap wanpis na strong bilong mi i pinis. 17 Pinisim olgeta bel hevi bilong mi, na bel bilong mi i ken i stap isi. Helpim mi, na ol hevi bai i no inap daunim mi.

Buk Song o Sam 34:18 God i save stap klostu long ol manmeri i gat hevi. Na em i save helpim ol manmeri bilip bilong ol i bagarap.

Buk Song o Sam 38:8 Mi bagarap tru na mi stap nogut, olsem wanelpa samting i krungutim mi strong. Bel bilong mi i pilim nogut tru, na mi singaut long bikpela pen.

Buk Song o Sam 55:4 Mi pret moa yet long ol, na mi tingting long i dai, na dispela i mekim bel bilong mi i hevi tru.

Buk Song o Sam 61:2,3 Mi stap longwe long ples bilong mi, na bel bilong mi i hevi tru. Olsem na mi singaut long yu bilong yu ken helpim mi. Bringim mi i go long wanelpa ples hait, bai ol birua i no inap bagarapim mi. 3 Long wanem, yu tasol yu save lukautim mi gut. Yu tasol i strongpela banis bilong mi, olsem na ol birua i no inap daunim mi.

Buk Song o Sam 62:8 Yupela ol lain bilong mi, oltaim yupela i mas bilip long God. Yupela i mas autim olgeta hevi na olgeta tingting bilong yupela long em. Long wanem, yumi ken i go long em na i stap gut.

Buk Song o Sam 73:26 Sapos bodi na tingting bilong mi i no gat strong moa, orait God, yu yet yu strong bilong mi. Na yu stap wantaim mi na mi inap tru oltaim oltaim.

Buk Song o Sam 77:2,3 Long taim bilong hevi mi save prea long Bikpela. Long olgeta nait mi save prea long em, tasol mi no kisim bel isi. 3 Mi tingting long God na bel bilong mi i krai. Mi tingting i stap na bel bilong mi i hevi.

Buk Song o Sam 86:11 Bikpela, yu mas skulim mi gut long pasin yu laik mi mekim, na oltaim bai mi bihainim laik bilong yu. Lainim mi gut bai mi tingting long yu wanelpa tasol, na mi mekim wok bilong yu oltaim.

Buk Song o Sam 109:22 Mi stap rabisman tru na mi stap nating, na mi pilim nogut.

Buk Song o Sam 112:7,8 Sapos em i harim nius bilong ol hevi i kamap, em i no save pret. Em i save bilip strong long Bikpela. 8 Em i no save wari na pret long ol samting. a em i save, ol birua bai i lus long pait.

Buk Song o Sam 143:4 Olsem na tingting bilong mi i bagarap, na bel bilong mi i hevi moa yet.

Buk Song o Sam 147:3 Em i save mekim orait ol manmeri, hevi i bagarapim tingting bilong ol na ol i pilim nogut. Na em i pasim ol sua bilong ol.

Gutpela Sindaun 14:30 Sapos man i stap bel isi, orait bodi bilong en bai i stap gut. Tasol sapos man i mangal na bel nogut oltaim long ol arapela man, dispela pasin i olsem sik nogut i wok long bagarapim ol bun bilong en.

Saveman 1:13 Mi bin tingting long kisim save long olgeta samting i save kamap long dispela graun, na mi laik tingting gut long en bilong painimaut as tru bilong en. Tasol dispela wok God i givim yumi em i bikpela hevi tru.

Saveman 2:10 Mi no bin pasim laik bilong mi liklik. Nogat tru. Long taim mi laikim wanpela samting, orait mi kisim tasol. Na mi bin amamas tru long olgeta wok mi bin mekim. Na dispela amamas i olsem pe bilong dispela wok.

Saveman 2:22,23 Oltaim yumi save hatwok na tingting planti long ol samting, tasol dispela i bekim wanem gutpela samting long yumi? 23 Taim yumi stap long dispela graun, olgeta samting i save mekim yumi i wari tru na i bel hevi. Na long nait yumi wok yet long tingting planti na i no gat malolo bilong yumi. Dispela pasin tu i no gat as bilong en.

Saveman 11:10 Taim bilong yupela i stap yangpela i no longpela taim. Nogat. Em i olsem samting nating. Olsem na yupela i no ken tingting planti long ol samting i save givim hevi long yupela. Na yupela i no ken bihainim pasin i givim pen long bodi bilong yupela.

Aisaia 30:29 Tasol yupela ol manmeri bilong Bikpela, taim yupela i lukim ol dispela samting i kamap, yupela bai i mekim ol song bilong amamas olsem yupela i save mekim long taim bilong bikpela de bilong lotu. Yupela bai i amamas tru olsem ol man i amamas long go antap long maunten bilong Bikpela na mekim musik long ol mambu samting bilong ol. Bikpela em i olsem strongpela ston na em yet i ples hait bilong ol Israel.

Aisaia 57:15 "Mi yet mi God, na mi save stap oltaim. Nem bilong mi i holi na mi God bilong mekim gutpela na stretpela pasin olgeta. Mi stap antap tru long gutpela ples bilong mi yet. Tasol mi stap tu wantaim ol manmeri i save daunim ol yet na sori long ol sin bilong ol. Na mi save strongim bel bilong ol na mekim laip bilong ol i kamap gutpela gen.

Aisaia 65:14 Bel bilong ol wokman bilong mi bai i pulap long amamas na bai ol i singim ol song bilong amamas. Tasol bel bilong yupela bai i pulap long sori na tingting bilong yupela bai i pas na yupela bai i krai strong tru.

Aisaia 66:13,14 Bai mi lukautim yupela gut tru olsem mama i lukautim gut pikinini bilong en na i mekim gutpela tok bilong mekim bel bilong pikinini bilong en i stap isi. Na bai yupela i stap long Jerusalem na bai yupela i stap bel isi. 14 Taim yupela i lukim dispela samting mi mekim long yupela bai bel bilong yupela i amamas tru na bai yupela i kamap strongpela lain

**tru. Na yupela ol wokman bilong mi bai i save gut long strong bilong mi,
Bikpela bilong yupela. Na ol birua bilong mi bai i pilim belhat bilong mi.”**

**Jeremaia 15:16 Yu bin givim tok bilong yu long mi na mi kisim, olsem man i
kisim kaikai. Na dispela tok bilong yu i mekim mi i amamas na belgut tru,
long wanem, mi bilong yu, God Bikpela I Gat Olgeta Strong.**

**Jeremaia 24:7 Na bai mi givim tingting long ol na bai ol i save olsem, mi yet
mi Bikpela. Na bai ol i kam bek long mi na bel tru long mi. Na bai ol i
kamap lain manmeri bilong mi, na bai mi stap God bilong ol.**

**Jon 14:1 Jisas i tok moa olsem, “Yupela i no ken bel hevi na tingting planti.
Yupela i bilip long God. Yupela i mas bilip long mi tu.**

**Jon 14:27 “Mi laik lusim yupela, na mi givim bel isi long yupela bai em i ken i
stap long yupela. Bel isi bilong mi, em mi givim long yupela. Na bel isi mi
givim long yupela, em i no wankain olsem ol manmeri bilong graun i save
givim. Olsem na yupela i no ken bel hevi na tingting planti, na yupela i no
ken pret.**

**Jon 16:6 Mi mekim dispela tok long yupela, na nau bel bilong yupela i hevi
tumas.**

**Jon 16:22 Olsem tasol, nau yupela i bel hevi. Tasol mi bai lukim yupela gen,
na bel bilong yupela bai i amamas. Na i no gat wapel man inap rausim
dispela amamas bilong yupela.**

**Aposel 2:46 Long olgeta de ol i save bung wantaim long tempel. Na ol i save
kaikai wantaim long narapela narapela haus bilong ol. Bel bilong ol i
gutpela, na ol i save amamas na kaikai wantaim.**

Rom 9:2 Oltaim mi save bel sori tru, na mi save wari na tingting planti.

**2 Korin 2:4 Tru, taim mi raitim pas long yupela, mi wari moa yet na bel bilong
mi i gat bikpela hevi tru na mi krai planti wantaim. Tasol mi no bin raitim
dispela pas bilong givim bel hevi long yupela. Nogat. Mi raitim bilong
yupela i ken save olsem, mi laikim yupela tumas na mi givim bel bilong mi
moa yet long yupela.**

**Efesus 5:19 Na taim yupela i toktok wantaim ol arapela manmeri bilong God,
yupela i mas kisim ol tok i stap long ol song bilong Buk Song na long ol
arapela song bilong lotu na long ol song Holi Spirit i kamapim long bel
bilong yupela, na putim insait long tok bilong yupela. Na yupela i mas
singim ol song long Bikpela, long maus na long bel bilong yupela tu.**